

ՀԱՅՈՑ ՄՄԲԱՏ Ա ԹԱԳԱՎՈՐԻ ԱԲԽԱԶԱԿԱՆ ԱՐՇԱՎԱՆՔԸ

ԵՂԻԱԶԱՐՅԱՆ Ա. Ս.

Հայոց Սմբատ Ա արքայի (890-914) թագավորության ժամանակաշրջանի պատմության մեջ կարևոր տեղ ունի արխագական արշավանքը, որի մանրակրկիտ քննությամբ, որքան մեզ է հայտնի, դեռևս որևէ հետազոտող չի զբաղվել: Մինչդեռ այդ արշավանքի ուսումնասիրությունը և դրա թվագրումը կարող են հստակ պատկերացում տալ X դ. սկզբին հայ Բագրատունիների տերության հզորության, ընդգրկած տարածքի և վարչաքաղաքական բաժանման մասին:

Սկզբնաղբյուրների տեղեկությունները ցույց են տալիս, որ արխագական թագավորությունը հայ Բագրատունիների գերիշխանությունն ընդունել էր դեռևս Աշոտ Ա Բագրատունու օրոք (Արմինիա ոստիկանության իշխանաց իշխան՝ 862-885 թթ., հայոց թագավոր՝ 885-890 թթ.): Հովհաննես Դրասխանակերտցին գրում է, որ Աշոտ Ա-ն «զթագաւորն Եգերացոց ի սէր միաբանութեան ընդ իւր կապակցեալ՝ այնպէս նմա այցելէր, մինչ զի անընդհատ յորդիութեան սակի գոլով՝ մտերմաբար պարտավճար միշտ նմա ի ծառայութիւն բերէր»¹:

Արդ, անդրադառնանք Սմբատ Ա-ի արխագական արշավանքին:

Ըստ Հովհաննես Դրասխանակերտցու, որը Սմբատ Ա-ի ժամանակակիցն էր, արխագական արշավանքը տեղի է ունեցել հետևյալ ժամանակագրական հերթականությամբ: 901 թ. Ատրպատականի ամիրա է դառնում Յուսուփ Սաջյանը: 903 թ. նա արշավում է Հայաստան, սակայն մեծ բանակով նրան ընդառաջ է գնում Սմբատ Ա-ն: Դա Յուսուփին ստիպում է հաշտվել հայոց թագավորի հետ: Դրանից հետո տեղի է ունենում Սմբատ Ա-ի արխագական արշավանքը, որից հետո էլ արաբական խալիֆան Սմբատին Ա-ին հրավիրում է մասնակցելու Յուսուփի դեմ պատժիչ արշավանքին, այնուհետև Գագիկ Արծրունին խնդրում է Սմբատ Ա-ին՝ Նախճավանը հանձնել իրեն, իսկ ավելի ուշ՝ 908 թ., Գագիկ Արծրունին թագ է ստանում Յուսուփից²: Ինչ վերաբերում է արխագական արշավանքին, ապա Հովհաննես Դրասխանակերտցին հաղորդում է, որ արխագական զորքերը ներխուժում են Վիրք, Ծանարք և Գուգարք: Քանի որ այդ տարածքներին տիրում էր Հայոց թագավոր Սմբատ Ա-ն, Վրաց (իմա՝ Կղարջքի)³ թագավոր Ատրներսեհն արխագական թագավոր Կոնստանդին Գ-ին (893-929) զգուշացնում է այդ քայլից: Սակայն արխագական թագավորը շարունակում է առաջխաղացումը, որին հետևում է Սմբատ Ա-ի արխագական արշավանքը: Արխա

¹ **Յովհաննու կաթողիկոսի Դրասխանակերտցույ Պատմութիւն Հայոց** (այսուհետև՝ *Հովհաննես Դրասխանակերտցի*), *Ժանդագրությունները Գ. Թոսունյանի, Ե., 1996, էջ 142:*

² *Նույն տեղում, էջ 196-214:*

³ **Ադոնց Ն., Պատմական ուսումնասիրություններ, Փարիզ, 1948, էջ 122:**

զական գորքերը պարտություն են կրում, իսկ Կոստանդին Գ-ն գերվում է Կղարջքի Ատրնեքսեի թագավորի կողմից ու հանձնվում Սմբատ Ա-ին: Այնուհետև հայկական գորքերը նվաճում են աբխազական թագավորությունը: Մասնավորապես գրավում են Փոյթի շրջանը՝ Գուրիան («Վուրի աշխարհ»): Սմբատ Ա-ն այնտեղ կուսակալներ է կարգում: Որոշ ժամանակ անց Կոստանդին Գ-ն ընդունում է Սմբատ Ա-ի գերիշխանությունն ու ազատ է արձակվում⁴:

Ըստ այս դեպքերի ժամանակակից կարծեցյալ Շապուհ Բագրատունու՝ Սմբատ Ա-ն աբխազական Դատոս⁵ (իմա՝ Կոստանդին Գ) թագավորի դստերը կնության է բերում իր որդի Մուշեղին և դրանից հետո տիրում է աբխազական թագավորության մեջ մտնող Կանգարք, Գոգշեն, Ձայլցեղ, Կող և Արտահան գավառներին: Այդ պատճառով աբխազական թագավորը ձերբակալում է Մուշեղին, իսկ Սմբատ Ա-ի գորքերը ներխուժում են աբխազական թագավորություն («Նավհանաց աշխարհ») և հասնում Գորի քաղաքին, որտեղ գտնվում էր Դատոսը Մուշեղի հետ: Աբխազական թագավորը բանակցությունների ժամանակ գերվում է, ազատում Մուշեղին և Սմբատ Ա-ին զիջում Կանգարքը, Գոգշենն ու Կողը: Բացի այդ, ի տարբերություն Հովհաննես Դրասխանակերտցու, ըստ որի՝ Կոստանդին Գ-ին գերել է Կղարջքի (Վրաց կոչված) թագավոր Ատրնեքսեի Բագրատունին, ըստ կարծեցյալ Շապուհ Բագրատունու՝ այդ արել է Վասպուրականի Գուրգեն իշխանը⁶: Մեր կարծիքով, Կղարջքի թագավորի չնչին դերակատարությունն է պատճառը, որ կարծեցյալ Շապուհ Բագրատունին նրան պարզապես չի հիշատակում:

Վերոհիշյալ տեղեկությունը, որքան էլ հակասական է, պարունակում է կարևոր իրողություններ: Այն, որ ըստ կարծեցյալ Շապուհ Բագրատունու՝ աբխազական թագավորը գրավել էր Գուգարքի որոշ գավառներ, ինչպես նաև Գորին, որը (գտնվում էր կենտրոնական Վիրքում) արդեն գրավել էր Սմբատ Ա-ն, հաստատում է Հովհան-նես Դրասխանակերտցու վերոհիշյալ վկայությունը: Մյուս կողմից, պարզվում է, որ Կոստանդինը տիրել էր նաև Կղարջքի Ատրնեքսեի թագավորին պատկանող որոշ գավառների, որը ստիպել է Ատրնեքսեին օգնության կանչելու իր տիրակալ Սմբատ Ա Տիեզերակալին: Խնդրո առարկա իրադարձությունների վերաբերյալ կարևոր տեղեկություններ է հաղորդում նաև «Վրաց տարեգրություն»-ը, ըստ որի՝ Կոստանդինն արշավում է Վիրք և նվաճում այն: Սմբատ Տիեզերակալն արշավանքի է ելնում, վերստին նվաճում Վիրքը, պաշարում կարևոր նշանակություն ունեցող Ուփլիսցիսե ամրոցը, գրավում գրոհով և ներխուժում աբխազական թագավորություն: Դրա-

⁴ Նույն տեղում, էջ 202-204:

⁵ Կարծեցյալ Շապուհ Բագրատունին շփոթում է Հայոց Սմբատ Ա և Աբաս թագավորների դեմ պատերազմած աբխազական Կոստանդին և Դատոս կամ Թևտաս թագավորներին [տե՛ս Պատմություն Շապուհ Բագրատունու (այսուհետև՝ Շապուհ Բագրատունի), ի լոյս ածին Գ. Տեր-Մկրտչեան եւ Մեսրոպ Լալիսկոպոս, Էջմիածին, 1921, էջ 81-83, Հաւաքումն պատմութեան Վարդանայ վարդապետի (այսուհետև՝ Վարդան վարդապետ), Վենետիկ, 1862, էջ 97-98]:

⁶ Շապուհ Բագրատունի, էջ 81-83:

նից հետո երկու թագավորները հաշտվում են, Կոստանդին ընդունում է Սմբատ Ա-ի գերիշխանությունն ու հետ ստանում Ուփլիսցիսեն⁷: Ըստ Զվանշեր պատմիչի՝ Սմբատ Ա-ն պատերազմեց Կոստանդինի դեմ և «էառ գՔարթլ և զՈւփլիսցիսե. և դարձեալ հաշտեալ՝ խնամիք եղեն»⁸, և դարձոյց անդրէն»⁹:

Աշխարհագրական առումով Կոստանդին Գ-ի արշավանքը ներառում էր Կղարջքի թագավորությունը, Կենտրոնական Վիրքը (Շիրակ Քարթլի), Գուգարքի որոշ գավառներ և Ալանաց դուռը՝ շրջակա ցեղերով:

Ամփոփենք. արխագական կամ եզերաց Կոստանդին Գ թագավորը արշավանք է կատարում դեպի Կղարջքի թագավորություն, Ալանաց դուռ և Վիրք, որոնք նախապես արդեն նվաճել էր Սմբատ Ա-ն: Կղարջքի թագավոր Ատրներսեհը զգուշացնում է նրան այդ քայլից, բայց ապարդյուն: Սմբատ Ա-ն, իր հետ վերցնելով Ատրներսեհին և իր նախարարներին, մեծ բանակով արշավում է Կոստանդինի դեմ, որը ստիպված հաշտություն է խնդրում, բայց բանակցությունների ժամանակ գերվում է և բերվում հայոց թագավորի մոտ: Այնուհետև հայկական զորքը, հետ նվաճելով Կղարջքի թագավորության շրջանները և Վիրքը, ներխուժում է արխագական թագավորություն և նվաճում այն: Հայոց թագավորը տեղերում կուսակալներ է կարգում: Չորս ամիս անց, երբ արխագները ցանկանում են նոր թագավոր ընտրել, Սմբատ Ա-ն օգնական զորքով Կոստանդին Գ-ին ուղարկում է արխագական թագավորություն:

Հայ պատմիչները հաղորդումներ են պահպանել այն մասին, որ Վիրքը, Աղվանքը, Ծանարքը և կովկասյան լեռնական ցեղերին նվաճել էր դեռևս Աշոտ Ա-ն¹⁰: Հովհաննես Դրասխանակերտցին վկայում է, որ, բազմելով հայոց գահին, Սմբատ Ա-ն «ձգտեալ աճեցուցանէր զշաւիղ տէրութեան իւրոյ յարևմտից հիւսիսոյ մինչև ցԿարնոյ քաղաք, և անդր ևս քան զԿղարջս՝ քերեալ մինչև առ ափն ծովուն մեծի, և մինչև ցաահմանս Եգերացոց և մինչև ցստորոտ մեծի լերինս Կովկասու, զԳուգարացիս և ցԾանարս մինչև ցԴուռն Ալանաց, առեալ ևս յինքն՝ և զամբոց դրան պահակի նոցա. և անտի ի հարաւակողմն կոյս զԿուր գետով մինչև ի քաղաքն Տփլիսի. և զՈւտի գաւառ մինչև ի քաղաքն Հունարակերտ և մինչև ի Տուս և ի Շամքոր: Եւ այսպէս ընդարձակեալ զաահման տէրութեան իւրոյ, որ ընդ լծով արքունի սակից և բեկարաց և մաքսից կացուցեալ՝ զզէն քաջութեան մարտի իւրոյ նշան յաղթութեան կանգնէր»¹¹: Իսկ

⁷ Матиане Картлиса, перевод, введение и примечания Лордкипанидзе М., Тбилиси, 1976, с. 32.

⁸ Խոսքն այն մասին է, որ ըստ Հովհաննես Դրասխանակերտցու՝ Սմբատ Ա-ի հպատակներից Կղարջքի թագավոր Ատրներսեհ Բագրատունին Կոստանդին Գ-ի աներն էր:

⁹ Զուանշերի պատմիչի համաձայն պատմություն Վրաց, Վենետիկ, 1884, էջ 106:

¹⁰ Հովհաննես Դրասխանակերտցի, էջ 142, Թովմա Արծրունի և Անանուն, Պատմություն տանն Արծրունեաց (այսուհետև՝ Թովմա Արծրունի և Անանուն), բնագիրը՝ Վ. Վարդանյանի, Ե., 1985, էջ 322, Վարդան վարդապետ, էջ 91:

¹¹ Հովհաննես Դրասխանակերտցի, էջ 164:

կարծեցյալ Շապուհ Բագրատունին հաղորդում է, որ «թագաւորեաց տանն Հայոց Սըմպատ, որդի Աշոտոյ: Եւ էր նայ այր գոռոզ և պատերազմող և առատամիտ: Եւ աջողեցաւ ճանապարհ թագաւորութեանն նորայ:...Եւ նայ տիրեաց ամենայն աշխարհին Հայոց և ընդ ձեռամբ էած զՀայք և զՏայք, զՎիրք և զԱղվանք և զՎրաց դաշտ...: Եւ առեալ տիրեաց նմայ զՓայտակարանն, որ է Տփիսիս...: Եւ մեծամտեցաւ և անուանեաց զինքն Սըմպատ տիեզերակալ...Սըմպատ Հայոց և Վրաց թագաւոր և տիեզերակալ, բազում գաւառաց ինքնակալ»¹²: Այսինքն՝ Սմբատ Ա-ի թագավորության սկզբում հայոց տերությունն ընդգրկում էր Մեծ Հայքի և Այսրկովկասի մեծագույն մասը:

Այժմ, երբ արդեն որոշակի պատկերացում ունենք IX դ. վերջին հայոց տերության ընդգրկած տարածքի մասին, տեսնենք, թե ինչ սահմաններ ուներ հայոց տերությունը Սմբատ Ա-ի աբխազական արշավանքի ժամանակ: Կարծեցյալ Շապուհ Բագրատունին անչափ կարևոր մի տեղեկություն է տալիս այն մասին, թե ովքեր էին մասնակցում Սմբատ Ա-ի աբխազական արշավանքին: Դրանից կարելի է բխեցնել Սմբատ Ա-ի տերության կազմի և վարչաքաղաքական բաժանման որոշ կարևոր առանձնահատկություններ: Պատմիչը արշավանքի մասնակիցների թվում հանվան է հիշատակում է Արևելից իշխան Սմբատին, Փառիսոսի իշխան Հմայակին, Աղձնիքի իշխան Գրիգորին, Գոռոզի իշխան Վասակին, Վայոց ձորի իշխան Ապուշամբին, Տայոց իշխան Գոռամին, Ճողբաց իշխանին, Տարոնի իշխան Գագիկին, Վասպուրականի իշխան Գուրգենին, Մոկաց իշխան Աշոտին, Անձևացյաց իշխան Համակարին, Կորդվաց իշխանին և հայոց թագավորության մեջ գտնվող արաբական ամիրայություններին (ըստ պատմիչի՝ «յաշխարհէն Պարսից այլք բազումք»): Ըստ որում՝ Գուրգեն Արծրունու հետ արշավանքին մասնակցում էին նաև Գնունի իշխաններ¹³: Վերջիններս դեռևս Աշոտ Մսակերի (հայոց իշխան՝ 890-926 թթ.) կողմից վերաբնակեցվել էին Տայքում¹⁴, սակայն դատելով Թովմա Արծրունու հաղորդումներից՝ նրանց որոշ ներկայացուցիչներ մնացել էին Վասպուրականում¹⁵: Գնունիներից բացի, Վասպուրականի Գուրգեն իշխանի հետ եկել էին նաև Քաջբերունի, Գաբեղենից, Ջյունական, Գազրիկյան և Գնթունի տոհմերի իշխաններ¹⁶: Քարտեզագրելով այս անվանացանկի նախարարների և իշխանների տիրությունները՝ տեսնում ենք, որ Սմբատ Ա-ի տերության կազմի մեջ մտնող թագավորություններից և իշխանություններից արշավանքին չեն մասնակցել Սյունիքի (Սիսականի) իշխանության, Կախերի քորեպիսկոպոսության և «Աղվանից» թագավորության գորքերը: Ըստ Հովհաննես Դրասխանակերտցու՝ Կոստանդին Գ-ի արշավանքի թիրախներից մեկը հենց Կախերի քորեպիսկոպոսությունն էր, ավելի հստակ, վերջինիս՝ Ալանաց դուռն ընդգրկող շրջա

¹² Շապուհ Բագրատունի, էջ 65-67:

¹³ Նույն տեղում, էջ 82-83:

¹⁴ Վարդան Վարդապետ, էջ 83:

¹⁵ Թովմա Արծրունի և Անանուն, էջ 230:

¹⁶ Շապուհ Բագրատունի, էջ 81:

նր, այսինքն՝ բուն Ծանարքը: Արշավանքին Կախերի ուժերի չըմասնակցելու պատճառ կարելի է համարել այն, որ այդ քորեպիսկոպոսությունը կամ, որ ավելի հավանական է, դրա՝ Ալանաց դոներին հարևան հատվածը, նվաճել էր արխագական թագավորը:

Ինչ վերաբերում է անվանացանկում Սյունյաց Աշոտ իշխանի (մահ. 908 թ.¹⁷) անվան բացակայությանը, ապա, մեր համոզմամբ, պատճառը կարող է մեկը լինել: Քանի որ Սյունիքի իշխաններից արշավանքին մասնակցում էր Վայոց ձորի Ապուշամբ իշխանը, ապա Սյունյաց Աշոտ իշխանի մասնակցությունը ևս այդ հեռավոր արշավանքին հարվածի տակ կոներ հայոց թագավորության հարավային սահմանների անվտանգությունը: Մմբատ Ա-ի կողմից պարզապես անհեռատեսություն կլիներ թիկունքում ունենալով Մոսուլի և Ատրպատականի ամիրայությունների նման թշնամիների՝ բոլոր ուժերը նետել արխագական ճակատ: Նույնը կարող ենք ասել նաև Վասպուրականի գահերեց իշխան Գագիկ Արծրունու վերաբերյալ:

Անդրադառնալով Ադվանից թագավոր Համամի (մահ. մոտ 910 թ.¹⁸) բացակայությանը այդ արշավանքին՝ նշենք, որ դա առավել քան տարօրինակ է մի հույժ կարևոր փաստի պատճառով: Ըստ կարծեցյալ Շապուհ Բագրատունու՝ արխագական արշավանքին մասնակցում էր «Ճողբաց իշխանը»: Ճողբքը (կամ Ճիղբքը) տեղադրվում է Լփինքից հյուսիս (Լփինքը տարածվում էր Կուր և Երասխ գետերի միախառնման վայրից մինչև Շամախի քաղաքի շրջանը¹⁹) Փիրսաղաթ գետի վերին հոսանքի ավազանում՝ Կապաղակից արելելք²⁰: Այդ իրողությունը ցույց է տալիս, որ Հայ Բագրատունիների տերության մեջ էր մտնում նաև Ճիղբքը, որը, ինչպես կտեսնենք, պետք է մաս կազմեր հայոց տերության «Արևելից» կոչվող իշխանության: Ուստի, եթե արխագական արշավանքին մասնակցել է Ճիղբքի իշխանը, ապա Համամի բացակայությունը պետք է իր պատճառն ունենա: Մեր կարծիքով, անվանացանկում հիշատակվող «Արևելից իշխան Մմբատը» հենց նրա ներկայացուցիչն էր: Հովհաննես Դրասխանակերտցին Մմբատ Ա արքայի օրոք Համամին անվանում է «մեծ իշխանն Արևելից Համամ», որը հայոց թագավորի հրամանով գնում է բանակցելու արաբների հետ՝ հայոց կաթողիկոսին գերությունից ազատելու նպատակով²¹: Այսինքն՝ կարելի է բխեցնել, որ «Արևելից» էր կոչվում հենց Ադվանից թագավորությո-

¹⁷ Ըստ Ստեփաննոս Օրբելյանի՝ Յուսուփի 909 թ. արշավանքը տեղի է ունեցել Աշոտ Սյունու մահվան հաջորդ տարին (տե՛ս Պատմություն նահանգին Միսական, արարեալ Ստեփաննոսի Օրբելեան արքեպիսկոպոսի Սինեաց (այսուհետև՝ Ստեփաննոս Օրբելյան), Թիֆլիս, 1910, էջ 184-185): Յուսուփի այդ արշավանքի թվագրման հարցում կան տարակարծություններ, որոնց անդրադառնալը դուրս է մեր քննության շրջանակից:

¹⁸ Համամի որդի Ատրներսեհը սկսել է իշխել 910 թվականից (Ուլուքբայան Բ., Խաչենի իշխանությունը X-XVI դարերում, Ե., 1975, էջ 82):

¹⁹ Հարությունյան Բ., Լփինքի տեղադրության հարցի շուրջ (Բանբեր Երևանի համալսարանի, 1981, N 1, էջ 123):

²⁰ Հարությունյան Բ., Հայաստանն ըստ «Աշխարհացոյց»-ի և այլ աղբյուրների, քարտեզ, Ե., 2001:

²¹ Հովհաննես Դրասխանակերտցի, էջ 174:

յունը: Մովսես Կաղանկատվացին հաղորդում է, որ Սմբատ անունով Առանշահիկ մի իշխան IX դ. երկրորդ կեսին սպանել է Գրիգոր Առանշահիկի (որին սխալմամբ նույնացնում են Աղվանից թագավորության «հիմնադիր» Համամի հետ²²) ավագ որդի Ապուլին²³: Սմբատ Առանշահիկին Բ. Ուլուքաբյանը համարում է Գրիգորի որդին և Ապուլիի եղբայրը և նրա մահը դնում 897/898 թ.²⁴, չնայած Մովսես Կաղանկատվացու «Գրիգորի...երեց որդին Ապուլի սպանանի յազգակցեն Սմբատայ» տեղեկությունը բոլորովին էլ դրա օգտին չի խոսում, քանի որ այդ պարագայում պատմիչը պարզապես կասեր, որ Ապուլին սպանվել է իր եղբոր կողմից և ոչ թե ազգակցի (իմա՝ տոհմակցի): Բ. Ուլուքաբյանի կողմից Սմբատ Առանշահիկի մահ-վան թվագրումը 897/898-ով ևս անհիմն է, քանի որ դրա մասին սկզբնաղբյուրները որևէ հիշատակություն չեն պահպանել: Կարծում ենք՝ կարծեցյալ Շապուհ Բագրատունու հիշատակած «Արևելից իշխան Սմբատը» նույնական է վերոհիշյալ Սմբատ Առանշահիկին: Անգամ եթե սխալ է մեր նույնացումը, այնուամենայնիվ, ինչպես տեսանք, «Արևելից» անունով սկզբնաղբյուրները նշում են հենց Աղվանից թագավորությունը, որից էլ բխում է, որ «Արևելից իշխան Սմբատը» ներկայացնում էր Աղվանից թագավորությունը: Արխագական արշավանքին Համամի չմասնակցելը պետք է բացատրել այն բանով, որ հայ Բագրատունիների տերության «Արևելից» մեծ իշխան Համամը, գտնվելով Կովկասյան ցեղերի և Շիրվանշահերի վրտանգի ներքո, իր իշխանությունից բացակայել չէր կարող: Իսկ այն, որ Աղվանից թագավորությունը հայոց մեջ կոչվում էր «Արևելից», ապացուցում է Հովհաննես կաթողիկոսի այն վկայությունը, որ ինքը հալածական «ի կողմանս արևելայ Աղուանից առ մեծ իշխանն Սահակ երթեալ և առ թագաւորն նոցունց Ատրներսեհ»²⁵: Իսկ Մովսես Կաղանկատվացին տեղեկացնում է, որ Միհրանյանները ազգակցական կապ էին հաստատել Առանշահիկների հետ և «պատուաստութեամբս այսուիկ առ ի զոյգ ունել զպետութիւն արևելայց կողմանցս Աղուանից»²⁶:

Սմբատ Ա-ի արխագական արշավանքին մասնակցում էին նաև Հայոց Արևելից կողմերի բոլոր իշխանները, Գուրգեն Արծրունու հետ ներկայացել էր նաև Մոկաց Աշոտ իշխանը, առանձին գորախմբերով՝ Անձևացյաց և Տայքի իշխանները, ինչպես նաև հայոց տերության կազմում գտնվող ամիրայությունների գորաջոկատները:

Հատուկ ուշադրության է արժանի նաև Տարոնի իշխանությունը: Չնայած 898 թ. Թուղխի ճակատամարտում Սմբատ Ա-ի կրած պար-

²² Ուլուքաբյան Բ., նշվ. աշխ., էջ 75-77:

²³ Մովսես Կաղանկատուացի, Պատմութիւն Աղուանից աշխարհի (այսուհետև՝ Մովսես Կաղանկատվացի), քննական բնագիրը և ներածությունը Վ. Առաքելյանի, Ե., 1983, էջ 341:

²⁴ Ուլուքաբյան Բ., նշվ. աշխ., էջ 77, 82 և այլն:

²⁵ Հովհաննես Դրասխանակերտցի, էջ 220:

²⁶ Մովսես Կաղանկատվացի, էջ 338:

տությանը և Տարոնի կորստին²⁷, հայոց արքային հետագայում հաջողվել է կրկին իր տերության մեջ մտցնել Տարոնի իշխանությունը՝ վերջինիս մեջ մտնող թե՛ Աղձնիքի և թե՛ Տուրուբերանի գավառներով, որի հետևանքով արխագական արշավանքին մասնակցում էին Տարոնի իշխանության երկու հատվածների տերերը՝ Աղձնիքի իշխան Գրիգորը և Տարոնի իշխան Գագիկը։ Հայտնի է, որ 898 թ. Տարոնի իշխան էր դարձել Գրիգոր Բագրատունին²⁸։ Մեր քննության շրջանակից դուրս է Գրիգորի ինքնության պարզաբանումը, սակայն կարևոր է կարծեցյալ Շապուհ Բագրատունու հիշատակության մեջ Գրիգորին վերագրվող «Աղձնիքի իշխան» անվան մեկնաբանումը։ Այդ անունը, մեր կարծիքով, ոչ այլ ինչ է, եթե ոչ Տարոնի իշխանության մեջ մտնող Աղձնիքի գավառների ընդհանրության հիշատակությունը։ Կարծում ենք՝ Գագիկին, որն անհայտ է մյուս հայ պատմիչներին, տրվող «Տարոնի իշխան» անունը վերաբերում է Տարոնի իշխանության մնացյալ հատվածին։ Գրիգորի մասին որոշակի տեղեկություններ է պահպանել Կոստանդին Ծիրանածինը՝ նրան անվանելով «Գրիգոր Տարոնացի»²⁹։

Գրիգորի Ապոգանեմ անունով եղբայրը տիրույթներ ուներ Տարոնի իշխանության մեջ, որը Կոստանդին Ծիրանածինը անվանում է «Ապոգանեմի երկիր կամ պատրիկ Թոռնիկի բաժին», որը Ապոգանեմի որդի Թոռնիկը որոշեց հանձնել կայսրությանը։ Գրիգոր իշխանի որդիները կայսերն առաջարկեցին վերցնել Ուլնուտը (Եղնուտ կամ Եղանց բերդ)՝ շրջակայքով, Թոռնիկի երկրի փոխարեն։ Կայսրն ընդառաջեց և վերցրեց Եղնուտը՝ ողջ շրջակայքով։ Այնուհետև կայսր-պատմիչն ավելացնում է, որ Տարոնի երկիրը բաժանվեց երկու մասի։ Մի մասը գտնվում էր Գրիգորի որդիների, իսկ մյուս մասը՝ Ապոգանեմի որդիների ձեռքում³⁰։

Եթե համադրենք կարծեցյալ Շապուհ Բագրատունու և Կոստանդին Ծիրանածինի հաղորդումները, ապա, որպես Տարոնի Գրիգոր իշխանի ժամանակակիցներ, վերոհիշյալ պատմիչներից առաջինը հիշատակում է Գագիկ իշխանին, իսկ երկրորդը՝ Ապոգանեմին։ Մյուս կողմից, եթե ըստ Շապուհ Բագրատունու, Տարոնի իշխանը Գագիկն էր, ապա ըստ Կոստանդին Ծիրանածինի՝ Գրիգորը։ Ակնհայտ է, որ Ապոգանեմ անունը արաբական Աբու Ղանըմ անվան աղավաղումն է։ Բագրատունի իշխանը, մեր համոզմամբ, ունենալու էր նաև հայկական անուն։ Կարծում ենք, որ այն Շապուհ Բագրատունու հիշատակած Գագիկն է։ «Տարոնացի» կոչված Գրիգորը, փաստորեն, «Աղձնեց», այսինքն՝ Տարոնի իշխանության մեջ մտնող Աղձնիքի հողերի իշխանն էր, իսկ Տարոնին տիրում էր Գագիկ-Ապոգանեմը։ Այն, որ Ապոգանեմի տիրույթները գտնվում էին

Տա-

²⁷ Թովմա Արծրունի և Անանուն, էջ 366-368, Հովհաննես Դրասխանակերտցի, էջ 176-178։

²⁸ Կոստանդին Ծիրանածին (տե՛ս Օտար աղբյուրները Հայաստանի և հայերի մասին, Բյուզանդական աղբյուրներ, Բ, թարգմ. բնագրից, առաջաբան և ծանոթ. Հ. Բարթիկյանի, Ե., 1970, էջ 5), Հովհաննես Դրասխանակերտցի, էջ 176։

²⁹ Կոստանդին Ծիրանածին, էջ 4-5։

³⁰ Նույն տեղում, էջ 6-10։

րոն գավառում և հարակից շրջաններում, պարզ է դառնում թեկուզ Կոստանդին Ծիրանածինի այն հաղորդումից, որ հենց Թոռնիկն իր տիրույթները կտակեց կայսրությանը, Գրիգորի որդիները կայսերն առաջարկեցին վերցնել ոչ թե Թոռնիկի երկիրը, այլ Ուլնուտը՝ շրջակայքով: Այսինքն՝ նրանք չէին ցանկանում, որ Տարոնի իշխանության սիրտը՝ Տարոն գավառն անցնեի կայսրության գերիշխանության տակ: Սակայն, կարծում ենք՝ Գրիգորին Ծիրանածինի կողմից տրվող «Տարոնացի» անվանումը կարող էր ունենալ երկու պատճառ: Առաջին՝ Գրիգորին էր պատկանում գերագահությունը Տարոնի իշխանության մեջ և երկրորդ՝ նա տիրում էր Տարոն գավառի մի մասին: Այս պարագայում, ամենայն հավանականությամբ, երկու պատճառն էլ իրենց ազդեցությունն են թողել: Տարոնի գահերեց Գրիգոր Բագրատունին տիրելու էր Տարոնի իշխանության մեջ մրտնոդ Աղձնիքի հողերին և Աղձնիքին հարակից Տուրուբերանի Ասպակունյաց ձոր և Խոյթ կամ Խուրթ գավառներին, ինչպես նաև Տարոնի հարավային հատվածին՝ Մուշ քաղաքով, որտեղ էլ գտնվելու էր իշխանանիստը: Ըստ որում, Ուլնուտը, որ նույնական է Տուրուբերանի Արշամունիք կամ Աշմունիք գավառի հարավ-արևմուտքում գտնվող Եղանց բերդին կամ Եղնուտին³¹, սահմանակցում էր Տարոնին, այսինքն՝ եղբայրներին հաջողվել էր կայսերը զիջելով Տարոնի իշխանության մեջ մտնող Արշամունիքի տարածքները՝ իշխանության սահմաններում պահել Տարոն գավառն ամբողջությամբ:

Վերևում տեսանք, որ Սմբատ Ա-ի աբխազական արշավանքին մասնակցում էին դեռևս Աշոտ Ա-ի ժամանակներից հայոց թագավորության կազմի մեջ գտնվող բոլոր երկրների զինական ուժերը: Փաստորեն, Վասպուրականի, Սյունիքի և Արևելից («Աղվանից») իշխանությունները հայոց տերության համակարգում ձեռք էին բերել ընդգծված կուսակալությունների բնույթ, քանի որ սահմանակցում էին հայոց տերության վտանգավոր հարևանների հետ:

Նման մեծ արշավանք Սմբատ Ա-ն կազմակերպել էր նաև 898 թ. Շալբանիների ամիրայության դեմ, որի նպատակը Տարոնը նրա գերիշխանությունից ազատելն էր և, ինչպես կարծեցյալ Շապուհ Բագրատունու և Մովսես Կաղանկատվացու հաղորդումներն են ցույց տալիս, հայոց տերության սահմանների ընդլայնումը հարավից սահմանակից Շալբանիների ամիրայության հաշվին³²:

Աբխազական արշավանքը ձեռնարկելիս Սմբատ Ա-ն լավ էր հասկանում, որ գործ ունի հզոր ախոյանի հետ, և, չնայած դեռևս Աշոտ Ա-ի ժամանակներից աբխազական թագավորներն ընդունել էին հայոց թագավորի գերիշխանությունը, սակայն նրանց աճող հզորությամբ

³¹ Երեմյան Ա., *Հայաստանը և հարևան երկրները 855-953 թթ.*, քարտեզ, Ե., 1976:

³² «Մըմկատ էառ աշխարհն Ղլաթայ և շինեց ինքն բերդ և կամեցաւ ձգել զձեռն իւր ի Միջագետս Ասորոց», Շալբանի ամիրան Սմբատին մեղադրում է, թե նա կամենում է «ի Միջագետս անցանել ի աշխարհն Բաբելացոց» (Շապուհ Բագրատունի, էջ 72), «Թագաւորն Հայոց Սմբատ...անցանէ ասպատակաւ յաշխարհն Ասորեստանեայց, անդ ի դիմի հարկանին նմա զօրքն Տաճկաց, և փախստեամբ դարձուցանեն ի Հայս» (Մովսես Կաղանկատվացի, էջ 336):

յունը թույլ էր տալիս ձերբագատվել հայկական գերիշխանությունից և, դեռ ավելին, մարտահրավեր նետել հայոց թագավորին՝ նվաճելով նրա հողերի մի մասը: Ինչպես տեսանք, արխագական թագավորն ի սկզբանե հասկացավ, որ ապարդյուն է Սմբատ Ա-ի հսկա բանակի դեմ պայքարելը, և իր զորքերին հրամայեց ամրանալ բերդերում, որոնք շուտով գրավեցին հայկական զորքերը:

Դատելով սկզբնաղբյուրների հիշատակություններից՝ Սմբատ Ա-ի արխագական արշավանքը պետք է տեղի ունեցած լիներ կամ Աղստն գետի հովտով և Տփղիսի վրայով, որից այն կողմ անցնելու Ուփլիսցիս-Գորի-Սուրամ-Շորապան-Քութայիս ճանապարհով, այնտեղից էլ շարժվել արխագական թագավորության խորքերը կամ Սամշուղե-Տփղիս, այնուհետև առաջին ճանապարհի ուղեգծով և (կամ) Երազգավորս-Ախալքալաք-Ախալցխե-Սուրամ-Գորի- Ուփլիսցիս ճանապարհով, իսկ հետո՝ Սուրամ-Շորապան-Քութայիս-արխագական թագավորության խորքեր գծով: Վերը կատարված քննությունը մեզ այն համոզման է բերում, որ Սմբատ Ա-ի արխագական արշավանքը տեղի է ունեցել երրորդ ճանապարհով, այսինքն՝ ինչպես Հովհաննես Դրասխանակերտցու վկայության տրամաբանությունից է բխում, Սմբատ Ա-ն սկզբում օգնության է հասել Ատրնեսի Բագրատունուն, իսկ այնուհետև նրան իր հետ վերցրած՝ արշավել Գորի և Ուփլիսցիս: Գերելով արխագական թագավորին՝ Սմբատ Ա-ն իր զորքերը մտցրել է նրա թագավորության բուն տարածքը և նվաճել այն: Այստեղից էլ բխում է, որ նշված արշավանքի սկզբում Սմբատ Ա-ի զորքի հավաքատեղին, ամենայն հավանականությամբ, եղել է Երազգավորսը:

Անդրադառնալով նաև Սմբատ Ա-ի արխագական արշավանքի թվագրմանը: Ըստ պատմիչների՝ այն տեղի է ունեցել Ատրպատականի Յուսուփ ամիրայի 903 թ. արշավանքից հետո, երբ Սմբատ Ա-ն և Յուսուփն առանց արյունահեղության հաշտվեցին³³: Ինչպես տեսանք, արխագական արշավանքին մասնակցում էր Վասպուրականի Գուրգեն իշխանը, որը արշավանքից վերադարձավ և արդյունքների մասին զեկուցեց իր գահերեց եղբայր Գագիկին³⁴: Այսինքն՝ արխագական արշավանքի ժամանակ Վասպուրականի գահերեց իշխան Աշոտ Արծրունին արդեն մահացել էր: Վասպուրականի Արծրունյաց թագավորության պատմության ուսումնասիրողներից Վ. Վարդանյանն Աշոտի մահը դնում է 904 թ. նոյեմբերի 13-ին³⁵: Նա հենվում է Թովմա Արծրունու այն հաղորդման վրա, թե Աշոտը մահացել է 29 տարեկան հասակում, իսկ նրա տարիքը պետք է հաշվել հայոց 325

³³ Հովհաննես Դրասխանակերտցի, էջ 200-202, Ստեփանոսի Տարօնեցույ Ասողկան Պատմություն տիեզերական, հրատ. Ստ Մալխասեանց, Ս. Պետերբուրգ, 1885, էջ 163, Շապուհ Բագրատունի, էջ 80:

³⁴ Շապուհ Բագրատունի, էջ 83-85:

³⁵ Վարդանյան Վ., Վասպուրականի Արծրունյաց թագավորությունը, Ե., 1969, էջ 59: Տե՛ս նաև Հակոբյան Թ., Սյունիքի թագավորությունը (պատմա-աշխարհագրական առումով), Ե., 1966, էջ 35, Հարությունյան Հ., Հայաստանը IX-XI դարերում, Ե., 1959, էջ 50 և այլն:

թվականից (876)³⁶: Սակայն, եթե նկատի առնենք, որ 876 թ. ծնված Աշոտ Արծրունին մեկ տարեկան էր դառնալու 877 թ., ապա պարզ կդառնա, որ նրա 29-ամյակը լրանալու էր ոչ թե 904 թ., այլ 905 թ.³⁷: Այդ է ցույց տալիս նաև պարզ թվաբանական հաշվարկը: Ըստ այդմ՝ նա մահացել է ոչ թե 904 թ. վերջին, այլ 905 թ. վերջին: Այստեղից էլ բխում է մի կարևոր հետևություն՝ Սմբատ Ա-ի աբխազական արշավանքը, որը պետք է տեղի ունեցած լիներ Աշոտ Արծրունու մահից հետո, 906 թ. ավելի շուտ տեղի ունենալ չէր կարող:

Պետք է նշել, որ աբխազական արշավանքից հետո մինչև Յուսուփի 909 թ. ներխուժումը տեղի են ունենում մի քանի կարևոր իրադարձություններ: Մուկթաֆի խալիֆան (902-908) անհնազանդ Յուսուփի դեմ արշավանք է ծրագրում և Սմբատ Ա-ին նույնպես հրավիրում է մասնակցելու դրան³⁸: Այնուհետև տեղի ունեցան Վասպուրականի իշխանների ռազմական գործողությունները տեղի արաբների դեմ և Ամյուկ ամրոցի հետ կապված դեպքերը, ամենայն հավանականությամբ՝ 907 թ., երբ Գագիկ Արծրունին ամրոցը գրավեց, իսկ Սմբատ Ա-ն այն հետ նվաճեց և ապա վաճառեց Գագիկին: Անանունը հաղորդում է, որ դրանից անմիջապես հետո Յուսուփը խալիֆայի կողմից նշանակվեց Ատրպատականի և Հայաստանի ոստիկան³⁹: Խոսքը 908 թ. մասին է, երբ Մուկթաֆի խալիֆան մահացավ, իսկ նրա հաջորդը հաշտվեց Յուսուփի հետ ու վերջինիս նշանակեց ոստիկան⁴⁰: Միևնույն ժամանակ՝ 908 թ., տեղի ունեցավ կարևոր մի իրադարձություն: Թերևս հենց Ամյուկ ամրոցի հետ կապված դեպքերի ազդեցության տակ Գագիկ Արծրունին Սմբատ Ա-ին խնդրեց իրեն հանձնել Նախճավանը՝ նույնիսկ ընդունելով իր մեղավորությունը այն կորցնելու մեջ: Արքայի մերժումը Գագիկին մղեց դեպի Յուսուփը, որը նրան ընդունեց գրկաբաց և «հանձնեց» հայոց թագավորությունը⁴¹: Յուսուփը Գագիկ Արծրունուն հայոց թագավոր կարգեց 908 թ.⁴²: Ստեփաննոս Օրբելյանը հաղորդում է, որ Յուսուփի դեմ խալիֆայի կազմակերպած արշավանքից հետո, որին Սմբատ Ա-ն չմասնակցեց, Յուսուփը կարողացավ կարճ ժամանակ անց հաշտվել արդեն նոր խալիֆայի հետ: Այնուհետև նա զորքը հավաքեց և սպասեց մինչև անցնի ձմեռը, որպեսզի զարնանը ներխուժի Հայաստան: Հենց այդ ժամանակ՝ 908 թ., մահացավ Սյունյաց գահերեց Աշոտը⁴³, որի

³⁶ Թովմա Արծրունի և Անանուն, էջ 324:

³⁷ Աշոտ Արծրունու մահվան թվականը որոշելիս 905 թ. վրա կանգ են առել Ա. Ալպոյաճյանը (*Պատմական Հայաստանի սահմանները, Գահիրե, 1950, էջ 157*) և Հ. Ութմազյանը (*Սյունիքը IX-X դարերում, Ե., 1958, էջ 101*):

³⁸ Հովհաննես Դրասխանակերտցի, էջ 206:

³⁹ Թովմա Արծրունի և Անանուն, էջ 438:

⁴⁰ Հովհաննես Դրասխանակերտցի, էջ 206:

⁴¹ Նույն տեղում, էջ 212:

⁴² Թովմա Արծրունի և Անանուն, էջ 442: Առաքելյան Բ., *Երկիրը միավորելու ձգտում և պայքար օտար ներխուժման դեմ (Հայ ժողովրդի պատմություն, հ. III, Ե., 1976, էջ 36)*:

⁴³ Ռ. Մաթևոսյանն այդ իրադարձությունը դնում է 906 թ. (*Մաթևոսյան Ռ., Բագրատունյաց Հայաստանի պետական կառուցվածքն ու վարչական կարգը, Ե., 1990, էջ 83*), սակայն Ստեփաննոս Օրբելյանի հիշատակությունն այն մասին, որ նրա մահվանն հաջորդող զարնանը տեղի ունեցավ Յուսուփի

թաղմանը մասնակցում էր Սմբատ Ա-ն: Անցավ ձմեռը, և մյուս տարվա գարնանը Յուսուփը ներխուժեց Հայաստան: Յուսուփի արշավանքը Ստ. Օրբելյանը դնում է հայոց 358 թ., այսինքն՝ 909 թ.⁴⁴:

Հայ ուսումնասիրողները Սմբատ Ա-ի արխագական արշավանքը, որքան մեզ է հայտնի, երբևէ չեն թվագրել: Բ. Առաքելյանն այն տեղադրում է 903-908 թթ. միջև⁴⁵: Վրացի պատմաբան Ի. Ջավախիշվիլին Կոստանդին Գ-ի արշավանքը դեպի Գուգարք, Վիրք և Ալանաց դուռ դնում է 904 թ.⁴⁶: Հայ ուսումնասիրողների անորոշ թվագրումը հարցը թողնում է չլուծված, իսկ Ի. Ջավախիշվիլու նրշած թվականը անհնար է, քանի որ, ինչպես ցույց տվեցինք, արխագական արշավանքը չէր կարող տեղի ունեցած լինել նախքան 906 թ.: Մյուս կողմից՝ դատելով սկզբնաղբյուրներից, Սմբատ Ա-ն Կոստանդին Գ-ի դեմ արշավանքի էր դուրս եկել անմիջապես, այսինքն՝ Կոստանդին Գ-ի ներխուժումը և Սմբատ Ա-ի արխագական արշավանքը տեղի են ունեցել նույն թվականին: Քննությունը ցույց տվեց, որ Սմբատ Ա-ի արխագական արշավանքը պետք է տեղի ունեցած լիներ 905 թ. հետո՝ 906-908 թթ. միջև: Ամենայն հավանականությամբ, Ամյուկ ամրոցի միջադեպը տեղի է ունեցել 907 թ., այսինքն՝ արշավանքից հետո: Հովհաննես Դրասխանակերտցին հաղորդում է, որ արշավանքից քիչ առաջ Սյունյաց իշխանները լայն եկեղեցաշինական գործունեություն էին ծավալել⁴⁷: Դրա մասին առավել մանրամասն է խոսում Ստ. Օրբելյանը: Պատմիչն ի մասնավորի անդրադառնում է Տաթևի վանքի մայր տաճարի շինարարությանը, որը սկսվել էր 895 թ. և ավարտվել 10 տարում: Շինարարությունն ավարտվել է 905 թ.: Հետո տեղի է ունեցել Տաթևի վանքի մայր տաճարի նավակատիքը, որին Սմբատ Ա-ի գլխավորությամբ հրավիրվել էին հայոց մեծամեծները: Նրանք գյուղեր և հողեր ընծայեցին տաճարին: Այնուհետև, ըստ պատմիչի, արդեն 906 թ., կազմվեց ընծաների վավերագիրը⁴⁸: Հովհաննես Դրասխանակերտցու և Ստ. Օրբելյանի տեղեկությունների համադրումը ցույց է տալիս, որ Սմբատ Ա-ի արխագական արշավանքը տեղի է ունեցել Տաթևի վանքի մայր տաճարի նավակատիքից (905 թ.) հետո:

Վերոհիշյալից կարելի է եզրակացնել, որ Սմբատ Ա-ի արխագական արշավանքը տեղի է ունեցել 906 թ.: Դա մի ժամանակաշրջան է, երբ, օգտագործելով 903 թ. սկսված խաղաղության շրջանը, Սմբատ Ա-ն հասել էր իր հզորության գագաթնակետին: Մենք դրանում արդեն համոզվեցինք, երբ քննության առանք այն խնդիրը, թե ինչ երկրներ և իշխանություններ էին մտնում Սմբատ Ա-ի տերութ-

արշավանքը Հայաստան (909 թ.), ցույց է տալիս, որ այդ թվագրումը սխալ է: Հ. Ութմազյանը ճիշտ կերպով նշում է 908 թ. (նշվ. աշխ., էջ 102):

⁴⁴ Ստեփաննոս Օրբելյան, էջ 184-185:

⁴⁵ Առաքելյան Բ., նշվ. աշխ., էջ 34:

⁴⁶ Ջավախիշվիլի Ի., Հին վրացական պատմագրությունը, Թիֆլիս, 1945, էջ 101 (վրացերեն):

⁴⁷ Հովհաննես Դրասխանակերտցի, էջ 202:

⁴⁸ Ստեփաննոս Օրբելյան, գլ. ԽԱ-ԽԳ:

յան մեջ և թե ինչպիսի բանակ էր հանել Սմբատ Ա-ն արիազական Կոստանդին Գ թագավորի դեմ:

АБХАЗСКИЙ ПОХОД АРМЯНСКОГО ЦАРЯ СМБАТА I

ЕГИАЗАРЯН А. С.

Резюме

Абхазский поход царя Смбата I (890-914) имел место в 906 г. после завоевания абхазским царем Константином III (893-929) входивших в состав государства Армянских Багратидов Кахетского княжества и нескольких областей Кларджского царства. В результате похода Смбата I абхазский царь был взят в плен, а армянские войска заняли Абхазское царство, где армянский царь назначил своего наместника. Позднее Константин III признал господство Смбата I и был освобожден. В период абхазского похода в состав государства Армянских Багратидов входили большая часть Великой Армении, Кларджское царство, Грузия, Кахетское княжество и Алуанк до Главного Кавказского хребта.